0.0.1 mahāsaļāyatanikasuttam

- 1. evam me sutam: ekam samayam bhagavā sāvatthiyam viharati jetavane anāthapindikassa ārāme. tatra kho bhagavā bhikkhū āmantesi bhikkhavo'ti. bhadante'ti te bhikkhū bhagavato paccassosum. bhagavā etadavoca:
- 2. mahāsaļāyatanikam vo bhikkhave desessāmi tam suņātha sādhukam manasi karotha bhāsissāmīti.
- **3.** evam bhanteti kho te bhikkhū bhagavato paccassosum. bhagavā etadavoca:
- 4. cakkhum bhikkhave, ajānam apassam yathābhūtam, rūpe ajānam apassam yathābhūtam, cakkhuviñ-ñāṇam ajānam apassam yathābhūtam, cakkhusamphassam ajānam apassam yathābhūtam, yampidam cakkhusamphassapaccayā uppajjati vedayitam sukham vā dukkham vā adukkhamasukham vā, tampi ajānam apassam yathābhūtam, cakkhusmim sārajjati, rūpesu sārajjati, cakkhuviñnāṇe sārajjati, cakkhusamphasse sārajjati, yampidam cakkhusamphassapaccayā uppajjati vedayitam sukham vā dukkham vā adukkhamasukham vā, tasmimpi sārajjati.
- 5. tassa sārattassa saṃyuttassa sammūļhassa assādānupassino viharato āyatiṃ pañcupādānakkhandhā upacayaṃ gacchanti. taṇhā cassa ponobhavikā nandirāgasahagatā tatratatrābhinandinī, sā cassa pavaḍ-

dhati. tassa kāyikāpi darathā pavaḍḍhanti, cetasikāpi darathā pavaḍḍhanti, kāyikāpi santāpā pavaḍḍhanti, cetasikāpi santāpā pavaḍḍhanti, kāyikāpi pariļāhā pavaḍḍhanti, cetasikāpi pariļāhā pavaḍḍhanti, so kāyadukkhampi cetodukkhampi paṭisaṃvedeti.

- 6. sotam bhikkhave, ajānam apassam yathābhūtam, sadde ajānam apassam yathābhūtam, sotaviññāṇam ajānam apassam yathābhūtam, sotasamphassam ajānam apassam yathābhūtam, yampidam sotasamphassapaccayā uppajjati vedayitam sukham vā dukkham vā adukkhamasukham vā, tampi ajānam apassam yathābhūtam, sotasmim sārajjati, saddesu sārajjati, sotaviññāne sārajjati, sotasamphasse sārajjati, yampidam sotasamphassapaccayā uppajjati vedayitam sukham vā dukkham vā adukkhamasukham vā, tasmimpi sārajjati.
- 7. tassa sārattassa saṃyuttassa sammūļhassa assādānupassino viharato āyatiṃ pañcupādānakkhandhā upacayaṃ gacchanti. taṇhā cassa ponobhavikā nandirāgasahagatā tatratatrābhinandinī, sā cassa pavaḍḍhati. tassa kāyikāpi darathā pavaḍḍhanti, cetasikāpi darathā pavaḍḍhanti, kāyikāpi santāpā pavaḍḍhanti, cetasikāpi santāpā pavaḍḍhanti, kāyikāpi pariļāhā pavaḍḍhanti, cetasikāpi pariļāhā pavaḍḍhanti, so kāyadukhampi cetodukkhampi patisamvedeti.
- 8. ghānam bhikkhave, ajānam apassam yathābhūtam, gandhe ajānam apassam yathābhūtam, ghānaviññā-

nam ajānam apassam yathābhūtam, ghānasamphassam ajānam apassam yathābhūtam, yampidam gandhasamphassapaccayā uppajjati vedayitam sukham vā dukkham vā adukkhamasukham vā, tampi ajānam apassam yathābhūtam, ghānasmim sārajjati, gandhesu sārajjati, ghānaviññāne sārajjati, ghānasamphasse sārajjati, yampidam ghānasamphassapaccayā uppajjati vedayitam sukham vā dukkham vā adukkhamasukham vā, tasmimpi sārajjati.

- 9. tassa sārattassa saṃyuttassa sammūļhassa assādānupassino viharato āyatiṃ pañcupādānakkhandhā upacayaṃ gacchanti. taṇhā cassa ponobhavikā nandirāgasahagatā tatratatrābhinandinī, sā cassa pavaḍḍhati. tassa kāyikāpi darathā pavaḍḍhanti, cetasikāpi darathā pavaḍḍhanti, kāyikāpi santāpā pavaḍḍhanti, cetasikāpi santāpā pavaḍḍhanti, kāyikāpi pariļāhā pavaḍḍhanti, cetasikāpi pariļāhā pavaḍḍhanti, so kāyadukkhampi cetodukkhampi paṭisaṃvedeti.
- 10. jivham bhikkhave, ajānam apassam yathābhūtam, rasā ajānam apassam yathābhūtam, jivhāviññānam ajānam apassam yathābhūtam, jivhāsamphassam ajānam apassam yathābhūtam, yampidam jivhāsamphassapaccayā uppajjati vedayitam sukham vā dukkham vā adukkhamasukham vā, tampi ajānam apassam yathābhūtam, jivhasmim sārajjati, rasesu sārajjati, jivhāviññāne sārajjati, jivhāsamphasse sārajjati, yampidam jivhāsamphassapaccayā uppajjati vedayitam sukham vā dukkham vā adukkhamasukham vā, tasmimpi sārajjati.

- 11. tassa sārattassa saṃyuttassa sammūļhassa assādānupassino viharato āyatiṃ pañcupādānakkhandhā upacayaṃ gacchanti. taṇhā cassa ponobhavikā nandirāgasahagatā tatratatrābhinandinī, sā cassa pavaḍḍhati. tassa kāyikāpi darathā pavaḍḍhanti, cetasikāpi darathā pavaḍḍhanti, kāyikāpi santāpā pavaḍḍhanti, cetasikāpi santāpā pavaḍḍhanti, kāyikāpi pariļāhā pavaḍḍhanti, cetasikāpi pariļāhā pavaḍḍhanti, so kāyadukhampi cetodukkhampi paṭisaṃvedeti.
- 12. kāyam bhikkhave, ajānam apassam yathābhūtam, phoṭṭhabbe ajānam apassam yathābhūtam, kāyaviñ-ñāṇam ajānam apassam yathābhūtam, kāyasamphassam ajānam apassam yathābhūtam, yampidam kāyasamphassapaccayā uppajjati vedayitam sukham vā dukkham vā adukkhamasukham vā, tampi ajānam apassam yathābhūtam, kāyasmim sārajjati, phoṭṭhabbesu sārajjati, kāyaviññāṇe sārajjati, kāyasamphasse sārajjati, yampidam kāyasamphassapaccayā uppajjati vedayitam sukham vā dukkham vā adukkhamasukham vā, tasmimpi sārajjati.
- 13. tassa sārattassa saṃyuttassa sammūļhassa assādānupassino viharato āyatiṃ pañcupādānakkhandhā upacayaṃ gacchanti. taṇhā cassa ponobhavikā nandirāgasahagatā tatratatrābhinandinī, sā cassa pavaḍḍhati. tassa kāyikāpi darathā pavaḍḍhanti, cetasikāpi darathā pavaḍḍhanti, kāyikāpi santāpā pavaḍḍhanti, cetasikāpi santāpā pavaḍḍhanti, kāyikāpi pariļāhā pavaḍḍhanti, cetasikāpi pariļāhā pavaḍḍhanti, so kāya-

dukkhampi cetodukkhampi paţisamvedeti.

- 14. manam bhikkhave, ajānam apassam yathābhūtam, dhamme ajānam apassam yathābhūtam, manoviñnānam ajānam apassam yathābhūtam, manosamphassam ajānam apassam yathābhūtam, yampidam manosamphassapaccayā uppajjati vedayitam sukham vā dukkham vā adukkhamasukham vā, tampi ajānam apassam yathābhūtam, manasmim sārajjati, dhammesu sārajjati, manoviñnāne sārajjati, manosamphasse sārajjati, yampidam manosamphassapaccayā uppajjati vedayitam sukham vā dukkham vā adukkhamasukham vā, tasmimpi sārajjati.
- 15. tassa sārattassa saṃyuttassa sammūļhassa assādānupassino viharato āyatiṃ pañcupādānakkhandhā upacayaṃ gacchanti. taṇhā cassa ponobhavikā nandirāgasahagatā tatratatrābhinandinī, sā cassa pavaḍḍhati. tassa kāyikāpi darathā pavaḍḍhanti, cetasikāpi darathā pavaḍḍhanti, kāyikāpi santāpā pavaḍḍhanti, cetasikāpi santāpā pavaḍḍhanti, kāyikāpi pariļāhā pavaḍḍhanti, cetasikāpi pariļāhā pavaḍḍhanti, so kāyadukkhampi cetodukkhampi paṭisaṃvedeti.
- **16.** cakkhuñca kho bhikkhave, jānaṃ passaṃ yathābhūtaṃ, rūpe jānaṃ passaṃ yathābhūtaṃ, cakkhuviñ-ñāṇaṃ jānaṃ passaṃ yathābhūtaṃ, cakkhusamphas-

bjt page 596

bjt page 598

sam jānam passam yathābhūtam, yampidam cakkhusamphassapaccayā uppajjati vedayitam sukham vā dukkham vā adukkhamasukham vā, tampi jānam passam yathābhūtam, cakkhusmim na sārajjati, rūpesu na sārajjati, cakkhuviññāne na sārajjati, cakkhusamphasse na sārajjati, yampidam cakkhusamphassapaccayā uppajjati vedayitam sukham vā dukkham vā adukkhamasukham vā, tasmimpi na sārajjati.

- 17. tassa asārattassa asaṃyuttassa asammūļhassa ādīnavānupassino viharato āyatiṃ pañcupādānakkhandhā apacayaṃ gacchanti. taṇhā cassa ponobhavikā nandirāgasahagatā tatratatrābhinandinī, sā cassa pahīyati. tassa kāyikāpi darathā pahīyanti, cetasikāpi darathā pahīyanti, kāyikāpi santāpā pahīyanti, cetasikāpi santāpā pahīyanti, kāyikāpi pariļāhā pahīyanti, cetasikāpi pariļāhā pahīyanti, so kāyasukhampi cetosukhampi patisamvedeti.
- 18. yā tathābhūtassa diṭṭhi, sāssa hoti sammādiṭṭhi. yo tathābhūtassa saṅkappo, svāssa hoti sammāsaṅkappo. yo tathābhūtassa vāyāmo, svāssa hoti sammāvāyāmo. yā tathābhūtassa sati, sāssa hoti sammāsati. yo tathābhūtassa samādhi, svāssa hoti sammāsamādhi. pubbeva kho panassa kāyakammaṃ vacīkammaṃ ājīvo suparisuddho hoti. evamassāyaṃ ariyo aṭthaṅgiko maggo bhāvanāpāripūrim gacchati.

- 19. tassa evam imam ariyam aṭṭhaṅgikam maggam bhāvayato cattāropi satipaṭṭhānā bhāvanā pāripūrim gacchanti. cattāropi sammappadhānā bhāvanā pāripūrim gacchanti. cattāropi iddhipādā bhāvanā pāripūrim gacchanti. pañcapi indriyāni bhāvanā pāripūrim gacchanti. pañcapi balāni bhāvanā pāripūrim gacchanti. sattapi bojjhaṅgā bhāvanā pāripūrim gacchanti.
- 20. tassime dve dhammā yuganaddhā vattanti samatho ca vipassanā ca. so ye dhammā abhiññā pariññeyyā, te dhamme abhiññā parijānāti. ye dhammā abhiññā pahātabbā, te dhamme abhiññā pajahati. ye dhammā abhiññā bhāvetabbā, te dhamme abhiññā bhāveti. ye dhammā abhiññā sacchikātabbā, te dhamme abhiññā sacchikaroti.
- 21. katame ca bhikkhave, dhammā abhiññā pariññeyyā: pañcupādānakkhandhātissa vacanīyam. seyyathīdam: rūpūpādānakkhandho vedanūpādānakkhandho saññūpādānakkhandho viññānūpādānakkhandho viññānūpādānakkhandho. ime dhammā abhiññā pariññeyyā.
- **22.** katame ca bhikkhave, dhammā abhiññā pahātabbā: avijjā ca bhavataṇhā ca. ime dhammā abhiññā pahātabbā.
- **23.** katame ca bhikkhave, dhammā abhiññā bhāvetabbā: samatho ca vipassanā ca. ime dhammā abhiññā bhāvetabbā.

- **24.** katame ca bhikkhave, dhammā abhiññā sacchikātabbā: vijjā ca vimutti ca. ime dhammā abhiññā sacchikātabbā.
- 25. sotam bhikkhave, jānam passam yathābhūtam, sadde jānam passam yathābhūtam, sotaviññānam jānam passam yathābhūtam, sotasamphassam jānam passam yathābhūtam, yampidam sotasamphassapaccayā uppajjati vedayitam sukham vā dukkham vā adukkhamasukham vā, tampi jānam passam yathābhūtam, sotasmim na sārajjati, saddesu na sārajjati, sotaviññāne na sārajjati, sotasamphasse na sārajjati, yampidam sotasamphassapaccayā uppajjati vedayitam sukham vā dukkham vā adukkhamasukham vā, tasmimpi na sārajjati.
- 26. tassa asārattassa asaṃyuttassa asammūļhassa ādīnavānupassino viharato āyatiṃ pañcupādānakkhandhā apacayaṃ gacchanti. taṇhā cassa ponobhavikā nandirāgasahagatā tatratatrābhinandinī, sā cassa pahīyati. tassa kāyikāpi darathā pahīyanti, cetasikāpi darathā pahīyanti, kāyikāpi santāpā pahīyanti, cetasikāpi santāpā pahīyanti, kāyikāpi pariļāhā pahīyanti, cetasikāpi pariļāhā pahīyanti, so kāyasukhampi cetosukhampi paṭisaṃvedeti.
- **27.** yā tathābhūtassa diṭṭhi, sāssa hoti sammādiṭṭhi. yo tathābhūtassa saṅkappo, svāssa hoti sammāsaṅ-

kappo. yo tathābhūtassa vāyāmo, svāssa hoti sammāvāyāmo. yā tathābhūtassa sati, sāssa hoti sammāsati. yo tathābhūtassa samādhi, svāssa hoti sammāsamādhi. pubbeva kho panassa kāyakammam vacīkammam ājīvo suparisuddho hoti. evamassāyam ariyo aţthaṅgiko maggo bhāvanāpāripūrim gacchati.

- 28. tassa evam imam ariyam aṭṭhaṅgikam maggam bhāvayato cattāropi satipaṭṭhānā bhāvanā pāripūrim gacchanti. cattāropi sammappadhānā bhāvanā pāripūrim gacchanti. cattāropi iddhipādā bhāvanā pāripūrim gacchanti. pañcapi indriyāni bhāvanā pāripūrim gacchanti. pañcapi balāni bhāvanā pāripūrim gacchanti. sattapi bojjhaṅgā bhāvanā pāripūrim gacchanti.
- 29. tassime dve dhammā yuganaddhā vattanti samatho ca vipassanā ca. so ye dhammā abhiññā pariññeyyā, te dhamme abhiññā parijānāti. ye dhammā abhiññā pahātabbā, te dhamme abhiññā pajahati. ye dhammā abhiññā bhāvetabbā, te dhamme abhiññā bhāveti. ye dhammā abhiññā sacchikātabbā, te dhamme abhiññā sacchikaroti.
- **30.** katame ca bhikkhave, dhammā abhiññā pariññeyyā: pañcupādānakkhandhātissa vacanīyam. seyyathīdam: rūpūpādānakkhandho vedanūpādānakkhandho saññūpādānakkhandho saṅkhārūpādānakkhandho viññānūpādānakkhandho. ime dhammā abhiññā pariññeyyā.

- **31.** katame ca bhikkhave, dhammā abhiññā pahātabbā: avijjā ca bhavataṇhā ca. ime dhammā abhiññā pahātabbā.
- **32.** katame ca bhikkhave, dhammā abhiññā bhāvetabbā: samatho ca vipassanā ca. ime dhammā abhiññā bhāvetabbā.
- **33.** katame ca bhikkhave, dhammā abhiññā sacchikātabbā: vijjā ca vimutti ca. ime dhammā abhiññā sacchikātabbā.
- 34. ghānam bhikkhave, jānam passam yathābhūtam, gandhe jānam passam yathābhūtam, ghānaviññāṇam jānam passam yathābhūtam, ghānasamphassam jānam passam yathābhūtam, yampidam ghānasamphassapaccayā uppajjati vedayitam sukham vā dukkham vā adukkhamasukham vā, tampi jānam passam yathābhūtam, ghānasmim na sārajjati, gandhesu na sārajjati, ghānaviññāṇe na sārajjati, ghānasamphasse na sārajjati, yampidam ghānasamphassapaccayā uppajjati vedayitam sukham vā dukkham vā adukkhamasukham vā, tasmimpi na sārajjati.
- 35. tassa asārattassa asaṃyuttassa asammūļhassa ādīnavānupassino viharato āyatiṃ pañcupādānakkhandhā apacayaṃ gacchanti. taṇhā cassa ponobhavikā nandirāgasahagatā tatratatrābhinandinī, sā cassa pahīyati. tassa kāyikāpi darathā pahīyanti, cetasikāpi darathā

pahīyanti, kāyikāpi santāpā pahīyanti, cetasikāpi santāpā pahīyanti, kāyikāpi pariļāhā pahīyanti, cetasikāpi pariļāhā pahīyanti, so kāyasukhampi cetosukhampi patisamvedeti.

- 36. yā tathābhūtassa diṭṭhi, sāssa hoti sammādiṭṭhi. yo tathābhūtassa saṅkappo, svāssa hoti sammāsaṅkappo. yo tathābhūtassa vāyāmo, svāssa hoti sammāvāyāmo. yā tathābhūtassa sati, sāssa hoti sammāsati. yo tathābhūtassa samādhi, svāssa hoti sammāsamādhi. pubbeva kho panassa kāyakammaṃ vacīkammaṃ ājīvo suparisuddho hoti. evamassāyaṃ ariyo aṭṭhaṅgiko maggo bhāvanāpāripūriṃ gacchati.
- 37. tassa evam imam ariyam aṭṭhaṅgikam maggam bhāvayato cattāropi satipaṭṭhānā bhāvanā pāripūrim gacchanti. cattāropi sammappadhānā bhāvanā pāripūrim gacchanti. cattāropi iddhipādā bhāvanā pāripūrim gacchanti. pañcapi indriyāni bhāvanā pāripūrim gacchanti. pañcapi balāni bhāvanā pāripūrim gacchanti. sattapi bojjhaṅgā bhāvanā pāripūrim gacchanti.
- 38. tassime dve dhammā yuganaddhā vattanti samatho ca vipassanā ca. so ye dhammā abhiññā pariññeyyā, te dhamme abhiññā parijānāti. ye dhammā abhiññā pahātabbā, te dhamme abhiññā pajahati. ye dhammā abhiññā bhāvetabbā, te dhamme abhiññā bhāveti. ye dhammā abhiññā sacchikātabbā, te dhamme abhiññā sacchikaroti.

- **39.** katame ca bhikkhave, dhammā abhiññā pariññeyyā: pañcupādānakkhandhātissa vacanīyam. seyyathīdam: rūpūpādānakkhandho vedanūpādānakkhandho saññūpādānakkhandho saṅkhārūpādānakkhandho viññānūpādānakkhandho. ime dhammā abhiññā pariññeyyā.
- **40.** katame ca bhikkhave, dhammā abhiññā pahātabbā: avijjā ca bhavataṇhā ca. ime dhammā abhiññā pahātabbā.
- **41.** katame ca bhikkhave, dhammā abhiññā bhāvetabbā: samatho ca vipassanā ca. ime dhammā abhiññā bhāvetabbā.
- **42.** katame ca bhikkhave, dhammā abhiññā sacchikātabbā: vijjā ca vimutti ca. ime dhammā abhiññā sacchikātabbā.
- 43. jivham bhikkhave, jānam passam yathābhūtam, rasā jānam passam yathābhūtam, jivhāviññānam jānam passam yathābhūtam, jivhāsamphassam jānam passam yathābhūtam, yampidam jivhāsamphassapaccayā uppajjati vedayitam sukham vā dukkham vā adukkhamasukham vā, tampi jānam passam yathābhūtam, jivhasmim na sārajjati, rasesu na sārajjati, jivhāviññāne na sārajjati, jivhāsamphasse na sārajjati, yampidam jivhāsamphassapaccayā uppajjati vedayitam sukham vā dukkham vā adukkhamasukham vā, tasmimpi na sārajjati.

- 44. tassa asārattassa asaṃyuttassa asammūļhassa ādīnavānupassino viharato āyatiṃ pañcupādānakkhandhā apacayaṃ gacchanti. taṇhā cassa ponobhavikā nandirāgasahagatā tatratatrābhinandinī, sā cassa pahīyati. tassa kāyikāpi darathā pahīyanti, cetasikāpi darathā pahīyanti, kāyikāpi santāpā pahīyanti, cetasikāpi santāpā pahīyanti, kāyikāpi pariļāhā pahīyanti, cetasikāpi pariļāhā pahīyanti, so kāyasukhampi cetosukhampi patisamvedeti.
- 45. yā tathābhūtassa diṭṭhi, sāssa hoti sammādiṭṭhi. yo tathābhūtassa saṅkappo, svāssa hoti sammāsaṅkappo. yo tathābhūtassa vāyāmo, svāssa hoti sammāvāyāmo. yā tathābhūtassa sati, sāssa hoti sammāsati. yo tathābhūtassa samādhi, svāssa hoti sammāsamādhi. pubbeva kho panassa kāyakammaṃ vacīkammaṃ ājīvo suparisuddho hoti. evamassāyaṃ ariyo aṭṭhaṅgiko maggo bhāvanāpāripūriṃ gacchati.
- 46. tassa evam imam ariyam aţţhaṅgikam maggam bhāvayato cattāropi satipaţţhānā bhāvanā pāripūrim gacchanti. cattāropi sammappadhānā bhāvanā pāripūrim gacchanti. cattāropi iddhipādā bhāvanā pāripūrim gacchanti. pañcapi indriyāni bhāvanā pāripūrim gacchanti. pañcapi balāni bhāvanā pāripūrim gacchanti. sattapi bojjhaṅgā bhāvanā pāripūrim gacchanti.
- **47.** tassime dve dhammā yuganaddhā vattanti samatho ca vipassanā ca. so ye dhammā abhiññā pariññeyyā, te dhamme abhiññā parijānāti. ye dhammā

abhiññā pahātabbā, te dhamme abhiññā pajahati. ye dhammā abhiññā bhāvetabbā, te dhamme abhiññā bhāveti. ye dhammā abhiññā sacchikātabbā, te dhamme abhiññā sacchikaroti.

- **48.** katame ca bhikkhave, dhammā abhiññā pariññeyyā: pañcupādānakkhandhātissa vacanīyam. seyyathīdam: rūpūpādānakkhandho vedanūpādānakkhandho saññūpādānakkhandho saṅkhārūpādānakkhandho viññānūpādānakkhandho. ime dhammā abhiññā pariññeyyā.
- **49.** katame ca bhikkhave, dhammā abhiññā pahātabbā: avijjā ca bhavataṇhā ca. ime dhammā abhiññā pahātabbā.
- **50.** katame ca bhikkhave, dhammā abhiññā bhāvetabbā: samatho ca vipassanā ca. ime dhammā abhiññā bhāvetabbā.
- **51.** katame ca bhikkhave, dhammā abhiññā sacchikātabbā: vijjā ca vimutti ca. ime dhammā abhiññā sacchikātabbā.
- 52. kāyam bhikkhave, jānam passam yathābhūtam, phoṭṭhabbe jānam passam yathābhūtam, kāyaviññānam jānam passam yathābhūtam, kāyasamphassam jānam passam yathābhūtam, yampidam kāyasamphassapaccayā uppajjati vedayitam sukham vā dukkham

vā adukkhamasukham vā, tampi jānam passam yathābhūtam, kāyasmim na sārajjati, poṭṭhabbesu na sārajjati, kāyasiññāne na sārajjati, kāyasamphasse na sārajjati, yampidam kayesamphassapaccayā uppajjati vedayitam sukham vā dukkham vā adukkhamasukham vā, tasmimpi na sārajjati.

- 53. tassa asārattassa asaṃyuttassa asammūļhassa ādīnavānupassino viharato āyatiṃ pañcupādānakkhandhā apacayaṃ gacchanti. taṇhā cassa ponobhavikā nandirāgasahagatā tatratatrābhinandinī, sā cassa pahīyati. tassa kāyikāpi darathā pahīyanti, cetasikāpi darathā pahīyanti, kāyikāpi santāpā pahīyanti, cetasikāpi santāpā pahīyanti, kāyikāpi pariļāhā pahīyanti, cetasikāpi pariļāhā pahīyanti, so kāyasukhampi cetosukhampi patisamvedeti.
- 54. yā tathābhūtassa diṭṭhi, sāssa hoti sammādiṭṭhi. yo tathābhūtassa saṅkappo, svāssa hoti sammāsaṅkappo. yo tathābhūtassa vāyāmo, svāssa hoti sammāvāyāmo. yā tathābhūtassa sati, sāssa hoti sammāsati. yo tathābhūtassa samādhi, svāssa hoti sammāsamādhi. pubbeva kho panassa kāyakammaṃ vacīkammaṃ ājīvo suparisuddho hoti. evamassāyaṃ ariyo aṭṭhaṅgiko maggo bhāvanāpāripūriṃ gacchati.
- 55. tassa evam imam ariyam aṭṭhaṅgikam maggam bhāvayato cattāropi satipaṭṭhānā bhāvanā pāripūrim gacchanti. cattāropi sammappadhānā bhāvanā pāripūrim gacchanti. cattāropi iddhipādā bhāvanā pāripūrim gacchanti.

pūrim gacchanti. pañcapi indriyāni bhāvanā pāripūrim gacchanti. pañcapi balāni bhāvanā pāripūrim gacchanti. sattapi bojjhangā bhāvanā pāripūrim gacchanti.

- 56. tassime dve dhammā yuganaddhā vattanti samatho ca vipassanā ca. so ye dhammā abhiñnā pariñneyyā, te dhamme abhiñnā parijānāti. ye dhammā abhiñnā pahātabbā, te dhamme abhiñnā pajahati. ye dhammā abhiñnā bhāvetabbā, te dhamme abhiñnā bhāveti. ye dhammā abhiñnā sacchikātabbā, te dhamme abhiñnā sacchikaroti.
- **57.** katame ca bhikkhave, dhammā abhiññā pariññeyyā: pañcupādānakkhandhātissa vacanīyam. seyyathīdam: rūpūpādānakkhandho vedanūpādānakkhandho saññūpādānakkhandho saṅkhārūpādānakkhandho viññāṇūpādānakkhandho. ime dhammā abhiññā pariññeyyā.
- **58.** katame ca bhikkhave, dhammā abhiññā pahātabbā: avijjā ca bhavataṇhā ca. ime dhammā abhiññā pahātabbā.
- **59.** katame ca bhikkhave, dhammā abhiññā bhāvetabbā: samatho ca vipassanā ca. ime dhammā abhiññā bhāvetabbā.
- **60.** katame ca bhikkhave, dhammā abhiññā sacchikātabbā: vijjā ca vimutti ca. ime dhammā abhiññā sacchikātabbā.

- 61. manam bhikkhave, jānam passam yathābhūtam, dhamme jānam passam yathābhūtam, manoviñnāṇam jānam passam yathābhūtam, manosamphassam jānam passam yathābhūtam, yampidam manosamphassapaccayā uppajjati vedayitam sukham vā dukkham vā adukkhamasukham vā, tampi jānam passam yathābhūtam, manasmim na sārajjati, dhammesu na sārajjati, manoviñnāne na sārajjati, manosamphasse na sārajjati, yampidam manosamphassapaccayā uppajjati vedayitam sukham vā dukkham vā adukkhamasukham vā, tasmimpi na sārajjati.
- 62. tassa asārattassa asaṃyuttassa asammūļhassa ādīnavānupassino viharato āyatiṃ pañcupādānakkhandhā apacayaṃ gacchanti. taṇhā cassa ponobhavikā nandirāgasahagatā tatratatrābhinandinī, sā cassa pahīyati. tassa kāyikāpi darathā pahīyanti, cetasikāpi darathā pahīyanti, kāyikāpi santāpā pahīyanti, cetasikāpi santāpā pahīyanti, kāyikāpi pariļāhā pahīyanti, cetasikāpi pariļāhā pahīyanti, so kāyasukhampi cetosukhampi paṭisaṃvedeti.
- 63. yā tathābhūtassa diṭṭhi, sāssa hoti sammādiṭṭhi. yo tathābhūtassa saṅkappo, svāssa hoti sammāsaṅkappo. yo tathābhūtassa vāyāmo, svāssa hoti sammāvāyāmo. yā tathābhūtassa sati, sāssa hoti sammāsati. yo tathābhūtassa samādhi, svāssa hoti sammāsamādhi. pubbeva kho panassa kāyakammam vacīkammam ājīvo suparisuddho hoti. evamassāyam ariyo aṭṭhaṅgiko maggo bhāvanāpāripūrim gacchati.

- 64. tassa evam imam ariyam aṭṭhaṅgikam maggam bhāvayato cattāropi satipaṭṭhānā bhāvanā pāripūrim gacchanti. cattāropi sammappadhānā bhāvanā pāripūrim gacchanti. cattāropi iddhipādā bhāvanā pāripūrim gacchanti. pañcapi indriyāni bhāvanā pāripūrim gacchanti. pañcapi balāni bhāvanā pāripūrim gacchanti. sattapi bojjhaṅgā bhāvanā pāripūrim gacchanti.
- 65. tassime dve dhammā yuganaddhā vattanti samatho ca vipassanā ca. so ye dhammā abhiññā pariññeyyā, te dhamme abhiññā parijānāti. ye dhammā abhiññā pahātabbā, te dhamme abhiññā pajahati. ye dhammā abhiññā bhāvetabbā, te dhamme abhiññā bhāveti. ye dhammā abhiññā sacchikātabbā, te dhamme abhiññā sacchikaroti.
- 66. katame ca bhikkhave, dhammā abhiññā pariññeyyā: pañcupādānakkhandhātissa vacanīyam. seyyathīdam: rūpūpādānakkhandho vedanūpādānakkhandho saññūpādānakkhandho viññānūpādānakkhandho viññānūpādānakkhandho. ime dhammā abhiññā pariññeyyā.
- **67.** katame ca bhikkhave, dhammā abhiññā pahātabbā: avijjā ca bhavataṇhā ca. ime dhammā abhiññā pahātabbā.
- **68.** katame ca bhikkhave, dhammā abhiññā bhāvetabbā: samatho ca vipassanā ca. ime dhammā abhiññā bhāvetabbā.

- **69.** katame ca bhikkhave, dhammā abhiññā sacchikātabbā: vijjā ca vimutti ca. ime dhammā abhiññā sacchikātabbāti.
- **70.** idamavoca bhagavā. attamanā te bhikkhū bhagavato bhāsitaṃ abhinandunti.

bjt page 600